

## Синаксарь

**В** сей день память совершаем Новосибирских новомучеников Николая и Иннокентия, в годину лютых гонений на веру Православную невинно от богоборцев пострадавших. Гонителие тщахуся возвести на них лжесвидетельства, во еже повинны их сотворити в противлении властем, в уготовлении мятежей и междоусобныя брани. В сих намерениях несмысленнии гонителие новомучеников уподобишася врагом Христовым на судилище у Пилата, иже искаху лжесвидетельства и не обретаху, яко писано во Святем Евангелии (Мф. 26, 59). Но якоже оных лжесвидетельства силы не имеяху, такожде и клеветы мучителей, возводимыя на священномучеников Николая и Иннокентия, пребыша тщетны. Святии явиша непоколебимость веры, необоримость надежды и крепость любве ко Христу. Пострадавшии за веру отцев своих, ныне прославляются в лице всех новомучеников и исповедников Церкви Русския и молятся Богу о спасении нашем. Аминь.